

# Powšitkowne WOZJEWJENJA

njedźelu, 24. měrca 2019

## **Póstny seminar w Smochćicach k přichodej cyrkwyje**

„Lóšt, nic hněw. Cyrkej mjez měrniwosću a wužadanjom“ rěka hlowna tema lětušich póstnych seminarow w Smochčanskim Domje biskopa Bena. Na třecim a poslednim wječoru póndźelu, 25. měrca, porěčitaj referentaj Michael Funke z Lipska a farar Sebastian Zehme z Großenhaina k temje „Wosada pyta nowe puće w Lipsku a Großenhainje“. Seminar, kotryž započnje so w 19.30 hodź., zarjadowuje Dom biskopa Bena w kooperaciji z Ewangelsko-lutherskim cyrkwiskim wobwodom Budyšin-Kamjenc, Budyskim dekanatom a Towarstwom Cyrila a Metoda z.t.

## **Koncert za akordeon a pišćełe w klóštrje**

Pod hesłom „Ave Maria“ zaklinča njedźelu, 24. měrca, w 16.30 hodź. w klóšterskej cyrkwi w Pančicach hudźbne modlitwy a meditacije k póstnemu časej a wysokemu swjedźenjeje Přizjewjenja Knjeza. Z Flöhya pochadźacy akordeonist Michael Lieberwirth a Budyski cyrkwinski hudźbnik a komponist Feliks Brojer zahrajetaj w tutej wosebitej a zdobom njewšědnej instrumentalnej zestawje wobdźěłane twórby mjezynarodnych komponistow. Wšitcy zajimcy su wutrobnje přeprošeni. Zastup je darmotny. Při durjach budže zběrka.

## **Šulerjo wot 6. do 8. lětnika přeprošeni**

Pod hesłom „TY pokazaš nam puć!“ přeprošuje młodžinske dekanatne dušepastyrstwo wšěch šulerjow wot 6. do 8. lětnika sobotu, 13. apryla, wot 9 do 14 hodź. do Don Boskowego domu we Worklecach. Na tutym zarjadowanju smědža wobdźělnicy mjez druhim sakrament wujednanja přijec. Zajimcy njech so prošu hač do wutory, 9. apryla, pod telefonowym čisłom 03 57 96 (8 87 07) we Worklecach přizjewja. Za wudawki dnja zběra so wot kóždeho wobdźělnika přinošk, kotryž wučinja štyri eura.

## **Džěło zbrašenych zeznać**

Džěłarnja swjateho Michała w Pančicach-Kukowje přeprošuje na dzeń wotewrjenych duri, kotryž budže pjatk, 29. měrca, wot 10 do 14.00 hodź. Zajimcy móža sej wobhladać, kak zbrašeni swoje džěło zdokonjeja, a so z personalom rozmołwjeć. Wodźenja po džěłarni poskićuja so w 10, 11 a 13 hodź. Čělnje derjeměće je zaručene.

## **Pytaja kubłarku – tež jako přidružnicu**

Radworski Katolski serbski džěćacy dom „Alojs Andricki“ pyta kubłarku abo přidružnicu, kotraž powołanje w běhu štyrjoch lět nawuknje a so wotydzěnju dwójce na kubljanju w šuli wobdźěli. Tež mužojo su witani. Nadrobniše informacije poda wjednica Andrea Henichowa, telefonowe čisło (03 59 35) 2 07 17.

## **Serbske kemše w Drježdžanach**

Drježdžanscy Serbja su na maćernorěčnu Božu mšu tutu njedźelu, 24. měrca, w 16.00 hodź. do cyrkwy swjateho Antonija w Drježdžanach-Löbtauwje, Bünauska hasa 10, přeprošeni. Kemše změje farar Gabriš Nawka. Božej mši přizamknje so zetkanje w tamnišej wosadnicy.

## **Młodźina na nócne modlenje do Kulowa**

Dekanatna młodźina je na nócne modlenje sobotu, 30. měrca, w 21 hodź. do Kulowa pře-prošena. Tema rěka „Mój podźěl w kraju žiwych“. Jich wočakuje mjez druhim Taizéski nyš-por před Najswjećišim, přiležnosť k swjatej spowědźi a wopołnocy njedźelna Boža mša.

## **Póstny wopor dekanatneje młodźiny**

Z lětušim póstnym woporum podpěruje dekanatna młodźina ponowjenje domu „Emmaus“ na Kukowskim hrodźišću. Wotpowědne listowe kuwerty su w cyrkwjach wupožžene.

## **Pój a pohladaj!**

Młodostnym, kotřiž so hłubšo ze žiwjenjom zaběraja – a tych njeje mało –, poskićuje farar Martin Kochalski we wobłuku powołanskeje pastoralki składnosť, so intensiwnišo z tym zaběrać. Hižo wjackróc je pod hesłom „Pój a pohladaj!“ zetkanja přewjedł. Wón zwěšća: „Naši młodostni su zwólniwi, do Boha a do jeho wołanja inwestować.“ Zajimowanym poskićuje duchowny ramik k modlenju, wuměnje a zetkawanju. Přichodny raz budže wot pjatka do soboty, 12. do 13. apryla w klóštrje Marijinej hwězdze, spočinajo we 18 hodź. Dalše tajke zetkanja budu w juniju, awgusće a nowemburu, stajnje na hinašim městnje. Přizjewić móža so zajimcy pola fararja Kochalskeho pod čisłom (01 72) 1 44 92 77.

► [berufung.bistum-dresden-meissen.de](http://berufung.bistum-dresden-meissen.de)

## **Putnikowanje swójbow**

Lětuše putnikowanje swójbow do Róžanta wotměje so njedźelu, 7. apryla. Boža mša, kotruž budže farar Beno Jakubaš swjećić, zahaji so w 9 hodź. w hnadownej cyrkwi. Hesło putnikowanja rěka „Štóz z was je bjez hrěcha, njech přeni čisnje kamjeń!“ (Jan 8,7).

## **Předstajeni komedije „Čeplski recept“**

Serbska lajska džiwadłowa skupina Chróscicy z.t. předstaji swoju komediju „Čeplski recept“ tutu njedźelu, 24. měrca, w 16.00 hodź. w Haslowje pola Bizoldec a njedźelu, 31. měrca, w 16.00 hodź. w Šunowskej Fabrikskej hospodze. Wšitcy zajimcy su wutrobnje witani.

## **Duchowny oratorij zaklinči**

Lubowarjo duchowneje hudźby smědža so na wosebitu hudźbnu chlósćenku wjeselić. Po 25 lětach zaklinči zaso oratorij „Israelowa zrudoba a tróšt“ wot Korle Awgusta Kocora. Komponist sam je tež słowa ze Stareho zakonja wupytał. Pod wumělskim nawodom Judith Kubicec spěwaja chóry Lipa, Meja a Serbskeho ludoweho ansambla (SLA) a hraje orchester SLA z hudźbnikami „Sinfonietty“ z Drježdžan. Solisća su Romy Petrick (sopran), Britta Schwarz (alt), Jens-Uwe Mürner (tenor) a komorny spěwar profesor Matthias Henneberg (bas). Dwurěčny tekstowy zešiwk so wšěm poskići.

Wšitcy su wutrobnje pře-prošeni na předstajeni duchowneho oratorija „Israelowa zrudoba a tróšt“ – sobotu, 6. apryla, w 19.00 hodź. do Chróšćanskeje cyrkwy a njedźelu, 7. apryla, w 17 hodź. do Drježdžanskeje Křižneje cyrkwy. Twórba zaklinči w orchestralnym wobdželanju Stefana Malzewa.

## **Swědka wěry dožiwić**

Po přikładze japoštołow putnikuje kapucin Fra Elia po wšěm swěće, zo by ludźi misionował. Wot 1990 dožiwja na swoim čěle Jězusowy pasion. Swój misioniski centrum ma w Calvi dell'Umbriji w Italskej. Tam hdys a hdys tež putnikow z Italskeje a wšeho swěta přijimuje. Njedźelu, 12. meje, porěči Fra Elia wot 15 do 17 hodź. w propstowskej cyrkwi swjateho Jana Nepomuka w Kamjenicy. Nadrobněše informacije nańdu zajimcy pod [www.posol.de](http://www.posol.de).

## **Program k projektej „Swětło pozbudža“**

We wobłuku wuměštwoweho projekta „Swětło pozbudža“ změje emeritowany biskop Alfons Nossol z Opoly tutu njedźelu, 24. měrca, w 15 hodź. w cyrkwi Našeje lubeje knjenje póstne přédowanje. Tři hodžiny pozdžišo wotměje so w Marije-Marćinej cyrkwi pasionska vesper. Hudźbny nawod změje cyrkwinski hudźbny direktor Michael Vetter. „Wosada pyta nowe puće w Lipsku a Großenhainje“ rěka tema póstneho seminara w Smochčanskim Domje biskopa Bena. Tón zahaji so pónđzeli, 25. měrca, w 19.30 hodź. Do šule modlenja pod hesłom „Modlić so – ale kak?“ su zajimcy wutoru, 26. měrca, wot 19.30 do 21 hodź. do Budyskeho klóšterka přeprošeni. Při tym dóstanu impulsy, móža zwučować a nazhonjenja wuměnjec. Přizjewić měli so pod telefonowym číslom (0 35 91) 21 10 83.

Na komplet su wšitcy pjatk, 29. měrca, w 21 hodź. do tachantskeje cyrkwy přeprošeni. Gospelowy chór St. Petri wuhotuje sobotu, 30. měrca, w 17 hodź. w Marije-Marćinej cyrkwi koncert w rjedže Duchowna hudźba. Nawod změje Sophie Heinitz. Ewangelska Boža služba k wopominanju zběžka w Budyskim jastwje zahaji so njedźelu, 31. měrca, w 10.30 hodź. w tachantskej cyrkwi. Serbskorěčny ekumeniski nyšpor na tym dnju budže w 17 hodź. w Michałskej cyrkwi. Samsny dzeń we 18 hodź. wotměje so w Marije-Marćinej cyrkwi pasionska vesper. Hudźbny nawod změje Fabian Kiupel. Cyłkowny program projekta „Swětło pozbudža“ je pod [www.posol.de](http://www.posol.de) wozjewjeny.

## **„Wopušćeny dom“ z poskitkom za staršich**

Na dalše předstajenje inscenacije „Wopušćeny dom“ njedźelu, 24. měrca, w 15 hodź. přeprošuje Němsko-serbske ludowe dźiwadlo na hłowne jewišćo do Budyšina. K tomu poskića wone za džěci wot pjeć lět tak mjenowanu dźiwadłowu pěstowarnju. To je darmotny poskitk staršim, kiž móža za čas wopyta předstajenja swoje džěci do tuteje pěstowarnje dać. W 16.00 hodź. předstaja Serbske džěćace dźiwadlo na tym dnju w Budyskim Dźiwadle na hrodže swoju najnowšu hru „Mały Muk“.

## **Putniska jězba do Ukrainy**

Putniska jězba do ukrajskeho Lviva (pólsce Lwów, němsce Lemberg) wotměje so wot štwórtka do wutory, 8. do 13. awgusta, ze Šmitec jězbami w Radworju. Hłowne město zapadneje Ukrainy je ze swojimi stawiznami a kulturu wulce zajimawe. Wšako je w běhu svojich stawiznow přežiwiło pólske, rakuske, sowjetske a němske knjejstwo. Wobdžělmy so na přikład na Božej mši po grjeksko-katolskim wobrjedže a wobhladamy sej katolsku uniwersitu. Dokładny program móža sej zajimcy pod [www.posol.de](http://www.posol.de) wobhladać. Přizjewjenja su móžne pola Šmitec wozydłownistwa w Radworju, telefonowe číslu (03 59 35) 28 60. *T. Kubašec*

## **Putnikowanja z busom a lětađlom**

Tež lětsa přeprošuju zaso zajimcow na putniske jězby. Přenja powjedže wot njedźele do njedźele, 23. do 30. junija, z busom do Toskany. Dalša putniska jězba z busom budže wot štwórtka, 3. oktobra, do wutory, 15. oktobra, do Lourdesa, Fatimy, Santiaga de Compostele a do Avile. Z lětađlom podamy so wot njedźele do njedźele, 8. do 15. septembra, na putnikowanje do Swjateho kraja. Nadrobnije informacije dóstanu zajimcy pod telefonowymaj číslomaj (01 63) 7 33 82 05 abo (03 57 96) 9 54 28 (po 19 hodź.) abo pola mje w Hórkach, Sydlišćowu puć 2. *Maćij Hadank*